

摘藻堂四庫全書薈要

集部

欽定四庫全書薈要卷一萬九千八百三

集部

樂府詩集卷九十

宋 郭茂倩 編

新樂府辭

樂府之名起於漢魏自孝惠帝時夏侯寬
為樂府令始以名官至武帝乃立樂府采
詩夜誦有趙代秦楚之謳則採歌謠被聲
樂其來蓋亦遠矣凡樂府歌辭有因聲而

作歌者若魏之三調歌詩因弦管金石造歌以被之是也有因歌而造聲者若清商吳聲諸曲始皆徒歌既而被之弦管是也有有聲有辭者若郊廟相和饒歌橫吹等曲是也有有辭無聲者若後人之所述作未必盡被於金石是也新樂府者皆唐世之新歌也以其辭實樂府而未常被於聲故曰新樂府也元微之病後人沿襲古題

唱和重複謂不如寓意古題刺美見事猶
有詩人引古以諷之義近代唯杜甫悲陳
陶哀江頭兵車麗人等歌行率皆即事名
篇無復倚旁乃與白樂天李公垂輩謂是
為當遂不復更擬古題因劉猛李餘賦樂
府詩咸有新意乃作出門等行十餘篇其有
雖用古題全無古義則出門行不言離別將
進酒特書列女其或頗同古義全創新詞則

田家止述軍輸捉捕請先螻蟻如此之類皆
名樂府由是觀之自風雅之作以至於今
莫非諷興當時之事以貽後世之審音者
儻採歌謠以被聲樂則新樂府其庶幾焉

樂府雜題

新曲

謝偃

青樓綺閣已含春
凝妝艷粉復如神
細細輕裾全漏影
離離薄扇詎障塵
樽中酒色恒宜滿
曲裏歌聲不厭新

紫燕欲飛先遶棟黃鸝始啞即嬌人
撩亂絲垂昏柳陌
參差濃葉暗桑津上客莫畏斜光晚
自有西園明月輪

同前二首

長孫無忌

家住朝歌下早傳名結伴來游淇水
上舊長情玉佩金
鈿隨步動雲羅霧縠逐風輕轉目
機心懸自許何須更
待聽琴聲

迴雪凌波遊洛浦遇陳王婉約娉婷
工語笑侍蘭房笑
蓉綺帳還開揜翡翠珠被爛齊光
長願今宵奉顏色不

愛聞簫逐鳳凰

湘川新曲二首

杜易簡

昭潭深無底橘洲淺而浮本欲凌波去翻為目成留願
君稍弭楫無令賤妾羞

二八相招攜採菱渡前谿弱腕隨橈起纖腰向舸低自
解看花笑憎聞染竹啼

小曲新辭二首

白居易

霽色鮮宮殿秋聲脆管弦聖明千載樂歲歲似今年

紅裾明月夜碧簾早秋時好向昭陽宿天源玉漏遲

公子行

劉希夷

天津橋下陽春水天津橋上繁華子馬聲迴合青雲外
人影動搖綠波裏綠波蕩漾玉為砂青雲離披錦作霞
可憐楊柳傷心樹可憐桃李斷腸花此日遨遊邀美女
此時歌舞入倡家倡家美女鬱金香飛去飛來公子傍
的的珠簾白日映娥娥玉顏紅粉妝花際徘徊雙蛺蝶
池邊顧步兩鴛鴦傾國傾城漢武帝為雲為雨楚襄王

古來容光人所羨況復今日遙相見願作輕羅著細腰
願為明鏡分嬌面與君相向轉相親與君雙棲共一身
願作貞松千歲古誰論芳槿一朝新百年同謝西山日
千秋萬古北邙塵

同前

陳羽

金羈白面郎何處踏青來馬嬌郎半醉蹀躞望樓臺似
見樓上人玲瓏牕戶開隔花聞一笑落日不知迴

同前

韓琮

紫袖長衫色銀蟾半臂花帶裝盤水玉鞍繡坐雲霞別
殿承恩澤飛龍賜渥注控羅青裊轡鏤象碧重葩意氣
催歌舞闌珊走鈿車袖障雲縹緲釵轉鳳歌斜珠卷迎
歸箔紅籠晃醉紗唯無難夜日不得似仙家

同前

顧況

輕薄兒白如玉紫陌春風纏馬足雙銓懸金縷鵬飛長
衫刺雪生犀束綠槐夾道陰初成珊瑚幾節敵流星紅
肌拂拂酒光凝當街背拉金吾行朝游鼙鼙鼓聲發莫

游藝藝鼓聲絕入門不肯自昇堂美人扶踏金階月

同前二首

聶夷中

漢代多豪族恩深益嬌逸走馳

一作馳

馬踏殺人街吏不敢

詰紅樓宴青春數里望雲蔚金釭燭勝晝不畏落暉疾

美人盡如月南威不敢匹芙蓉自天來不向水中出綺

席受雲和碧簫吹鳳質唯恨魯陽死無人駐白日

花樹出牆頭花裏誰家樓一行書不讀身封萬戶侯美

人樓上歌不是古涼州

同前

于鵠

少年初拜太長秋
半醉垂鞭見列侯
馬上抱鷄三市鬪
袖中攜劍五陵游
玉簫金管迎歸院
錦袖紅妝擁上樓
更向苑東新買宅
碧波春水入門流

同前

雍陶

公子風流輕錦繡
新裁白紵作春衣
金鞭留當誰家酒
拂柳穿花信馬歸

同前二首

張祜

玉堂前後畫簾垂立卻花驄待出時紅粉美人擎酒勸
錦衣年少臂鷹隨輕將玉板敲花片旋把金鞭約柳絲
晴日獨游三五騎等閑行傍曲江池

春色滿城池杯盤看處移鎗金斜雁子鞍帕嫩鶯兒買
笑畝桃李尋歌折柳枝可憐明月夜長是管弦隨

同前

孟賓于

錦衣紅奪彩霞明侵曉春遊向野庭不識農夫辛苦力
驕驄踏爛麥青青

將軍行

劉希夷

將軍闢轅門耿介當風立諸將欲言事逡巡不敢入劒
氣射雲天鼓聲振原隰黃塵塞路起走馬追兵急彎弓
從此去飛箭如雨集截圍一百重斬首五千級代馬流
血死敵人抱鞍泣古來養甲兵有事常討襲乘我廟堂
運坐使干戈戢獻凱歸京都軍容何翕習

同前

張籍

彈箏峽東有胡塵天子擇日拜將軍蓬萊殿前賜六纛

還領禁兵為部曲當朝受詔不辭家夜向咸陽原上宿
戰車彭彭旌旗動三十六軍齊上隴隴頭戰勝夜亦行
分兵處處收舊城敵人殺盡陰磧莫擾擾唯有牛羊聲
邊人親戚曾戰歿今逐官軍收舊骨磧西行見萬里空
樂府獨奏將軍功

老將行

王維

少年十五二十時步行奪取邊馬騎射殺山中白額虎
肯數鄴下黃鬚兒一身轉戰三千里一劒曾當百萬師

漢兵奮迅如霹靂敵騎奔騰畏蒺藜衛青不敗由天幸

李廣無功緣數奇自從棄置便衰朽世事蹉跎成白首

昔時飛箭無全目今日垂楊生左肘路傍時賣故侯瓜

門前學種先生柳蒼茫古木連窮巷寥落寒山對虛牖

誓令疎勒出飛泉不似潁川空使酒賀蘭山下陣如雲

羽檄交馳日夕聞節使三河募年少詔書五道出將軍

試拂鐵衣如雪色聊持寶劍動星文願得燕弓射天將

耻令越甲鳴吾軍莫嫌舊日雲中守猶堪一戰立功勲

燕支行

漢家天將才且雄，來時謁帝明光宮。
萬乘親推雙闕下，千官出餞五陵東。
誓辭甲第金門裏，身作長城玉塞中。
衛霍纔堪一騎將，朝廷莫數貳師功。
趙魏燕韓多勁卒，關西俠少何咆勃。
報讎只是聞嘗膽，飲酒不曾妨刮骨。
畫戟琱戈白日寒，連旗大旆黃塵沒。
疊鼓遙翻瀚海波，鳴笳亂動天山月。
麒麟錦帶佩吳鉤，颯沓青驪躍紫騮。
拔劍已斷天驕臂，歸鞍共飲月支頭。
漢軍大呼一當百。

敵騎相看哭且愁教戰雖令赴湯火終知上將先伐謀

桃源行

宋陶潛桃花源記曰晉太元中武陵人沿

溪捕魚忽

一作路

逢桃花林夾岸數百步中

無雜樹芳草鮮美落英繽紛漁人甚異之

復前行林盡水源得一山山有小口髣髴

有光乃捨船而入初纔通人行數十步豁

然開朗土地平曠屋舍儼然有良田美池

桑竹之屬阡陌交通雞犬相聞其中往來
種作男女衣著悉如外人黃髮垂髻怡然
自樂見漁人大驚問所從來邀還家為設
酒殺雞自云先世避秦亂率妻子邑人來
此不復出遂與外人隔絕問今何世乃不
知有漢無論魏晉漁人為具言皆歎惋停
數日辭去曰此中人語不足為外人道也
既出得船復由向路處處誌之其後欲往

迷不復得路云

漁舟逐水愛山春
兩岸桃花夾去津
坐看紅樹不知遠
行盡青溪不見人
山口潛行始隈隩
山開曠望旋平陸
遙看一處攢雲樹
近入千家散花竹
樵客初傳漢姓名
居人未改秦衣服
居人共住武陵源
還從物外起田園
月明松下房櫳靜
日出雲中鷄犬喧
驚聞俗客爭來集
競引還家問都邑
平明閭巷掃花開
薄暮漁樵乘水入
初因避地去人間
及至成仙遂不還
峽裏誰知有人事

世中遙望空雲山不疑靈境難聞見塵心未盡思鄉縣
出洞無論隔山水辭家終擬長游行自謂經過舊不迷
安知峯壑今來變當時只記入山深清溪幾度到雲林
春來遍是桃花水不辨仙源何處尋

同前

劉禹錫

漁舟何招招浮在武陵水拖綸擲餌信流去誤入桃源
行數里清源尋盡花綿綿踏花覓徑至洞前洞門蒼黑
烟霧生暗行數步逢虛明俗人毛骨驚仙子爭來致詞

何至此須臾皆破冰霜顏笑語一作委曲問世間因嗟

隱身來種玉不知人世如風燭筵羞石髓勸客食鐙熟
松脂留客宿鷄聲犬聲遙相聞曉光蔥籠開五雲漁人
振衣起出戶滿庭無路花紛紛翻然恐迷鄉縣處一息
不肯桃源住桃花滿溪水似鏡塵心如垢洗不去仙家
一出尋無蹤至今水流山重重

春女行

劉希夷

春女顏如玉怨歌陽春曲巫山春樹紅沅江春草綠自

憐妖艷姿妝成獨見時
愁心伴楊柳春盡亂如絲
目極千餘里悠悠春江水
遙想玉闌人愁卧金閨裏
尚言春花落不知秋風起
嬌愛猶未終悲涼從此始
憶昔楚王宮玉樓妝粉紅
纖腰弄明月長袖舞春風
容華委西山光陰不可還
桑林沒東海富貴今何在
寄言桃李容胡為閨閣重
但看楚王墓唯有數株松

同前

王翰

紫臺穹跨連綠波紅軒鈴
匝垂纖羅中有一人金作面

隔幌玲瓏遙可見忽聞黃鳥鳴且悲鏡邊含笑著春衣
羅袖嬋娟似無力行拾落花比容色落花一度無再春
人生作樂須及辰君不見楚王臺上紅顏子今日皆成
狐兔塵

洛陽兒女行

王維

洛陽女兒對門居纔可顏容十五餘良人玉勒乘驄馬
侍女金盤膾鯉魚畫閣朱樓盡相望紅桃綠柳垂簷向
羅幃送上七香車寶扇迎歸九華帳狂夫富貴在青春

意氣驕奢劇季倫自憐碧玉親教舞不惜珊瑚持與人
春窗曙滅九微火九微片片飛花璫戲罷曾無理曲時
妝成祇是薰香坐城中相識盡繁華日夜經過趙李家
誰憐越女顏如玉貧賤江頭自浣紗

扶南曲五首

翠羽流蘓帳春眠曙不開羞從面色起嬌逐語聲來早
向昭陽殿君王中使催

堂上清弦動堂前綺席陳齊歌盧女曲雙舞洛陽人傾

國徒相看寧知心所親

香氣傳空滿妝華影箔通歌聞天仗外舞出御筵中日
莫歸何處花間長樂宮

宮女還金屋將眠復畏明入春輕衣好半夜薄妝成拂
曙朝前殿玉除多珮聲

朝日照綺窗佳人坐臨鏡散黛恨猶輕插釵嫌未正同
心勿遽遊幸得春妝竟

笑歌行

李白

笑矣乎笑矣乎君不見曲如鉤古人知爾封公侯君不
見直如弦古人知爾死道邊張儀所以只掉三寸舌蘇
秦所以不墾二頃田笑矣乎笑矣乎君不見滄浪老人
歌一曲還道滄浪濯吾足平生不解謀此身虛作離騷
遣人讀笑矣乎笑矣乎趙有豫讓楚屈平賣身買得千
年名巢由洗耳有何益夷齊餓死終無成君愛身後名
我愛眼前酒飲酒眼前樂虛名何處有男兒窮通當有
時曲腰向君君不知猛虎不看機上肉洪鑪不鑄囊中

雖笑矣乎笑矣乎甯武子朱買臣叩角行歌背負薪今
日逢君君不識豈得不如佯狂人

江夏行

憶昔嬌小姿春心亦自持為言嫁夫壻得免長相思誰
知嫁商賈令人却愁苦自從為夫妻何曾在鄉土去年
下揚州相送黃鶴樓眼看帆去遠心逐江水流只言期
一載誰為厯三秋使妾腸欲斷恨君情悠悠東家西舍
同時發北去南來不逾月未知行李游何方作箇音書

能斷絕適來往南浦欲問西江船正見當壚女紅妝二
八年一種為人妻獨自多悲悽對鏡便垂淚逢人只欲
啼不如輕薄兒旦莫長追隨悔作商人婦青春長別離
如今正好同歡樂君去容華誰得知

橫江詞六首

人言橫江好儂道橫江惡一風一日吹倒山
一作猛風吹倒天門
山白浪高於瓦官閣

海湖南去過潯陽牛渚由來險馬當橫江欲渡風波惡

一水牽愁萬里長

橫江西望阻西秦漢水東流

一作楚水東連

揚子津白浪如山

那可渡狂風愁殺峭帆人

海神東

一作來

過惡風回浪打天門石壁開浙江八月何

如此濤似連山噴雪來

橫江館前津吏迎向余東指海雲生
郎今欲渡緣何事
如此風波不可行

日暈天風霧不開海鯨東蹙百川回
驚波一起三山動

公無渡河歸去來

靜夜思

牀前明月光疑是地上霜舉頭望山月低頭思故鄉

黃葛篇

黃葛生洛溪黃花自綿羃青烟蔓長條繚繞幾百尺閨人費素手採緝作絺綌縫為絕國衣遠寄日南客蒼梧大火落暑服莫輕擲此物雖過時是妾手中跡

采葛行

鮑溶

春溪幾回葛花黃黃麝引子山山香蠻女不惜手足損
鉤刀一一牽柔長葛絲茸茸春雪體深澗擇泉清處洗
殷勤十指蠶吐絲當窗娟娜聲高機織成一尺無一兩
供進天子五月衣水晶夏殿開涼戶冰山繞座猶難御
衣親玉體又何如杳然獨對秋風曙鏡湖女兒嫁鮫人
鮫綃逼穴色不分六中角簾泛清水搖曳勝被三素雲
自茲貢薦無人惜那敢更爭龍手跡蠻女將來海市頭
賣與嶺南貧估客

樂府詩集卷九十

欽定四庫全書薈要卷一萬九千八百四

集部

樂府詩集卷九十一

宋 郭茂倩 編

新樂府辭

樂府雜題

祖龍行

韋楚老

漢書五行志曰秦始皇三十六年鄭客從
關東來至華陰望見素車白馬從華山上

下知其非人道住止而待之遂至持壁與
客曰為我遺鎬池君因言今年祖龍死忽
不見鄭客奉壁即始皇二十八年過江所
湛壁也是歲始皇死後三年而秦滅顏師
古曰此直江神告鎬池之神以始皇將死
爾蘇林曰祖始也龍人君象謂始皇也應
劭曰祖人之先龍君之象祖龍行蓋出於此
黑雲兵氣射天裂壯士朝眠夢寃結祖龍一夜死沙丘

胡亥空隨鮑魚轍腐肉偷生二千里偽書先賜扶蘇死
墓接驪山土未乾瑞光已向芒碭起陳勝城中鼓三下
秦家天地如崩瓦龍蛇撩亂入咸陽少帝空隨漢家馬

鄴都引

張說

君不見魏武草創爭天祿羣雄睚眦相馳逐畫攜壯士
破堅陣夜接詞人賦華屋都邑繚繞西山陽桑榆漫漫
漳河曲城郭為墟人改代但有西園明月在鄴傍高塚
多貴臣蛾眉曼睂共灰塵試上銅臺歌舞處唯有秋風

愁殺人

孟門行

崔顥

黃雀銜黃花

一作
顥花

翩翩傍簷隙本擬報君恩如何反彈

射金壘美酒滿座春平原愛財多衆賓滿堂盡是忠義
士何意得有讒諛人諛人反覆那可道能令君心不自
保北園新栽桃李枝根株未固何轉移成陰結子君自
取若問傍人那得知

邯鄲宮人怨

邯鄲陌上三月春莫行逢見一婦人自言鄉里本燕趙
少小隨家西入秦母兄憐愛無儔侶五歲名為阿嬌女
七歲丰茸好顏色八歲黠慧能言語十三兄弟教詩書
十五青樓學歌舞我家青樓臨道傍紗窓綺幔暗聞香
日莫笙歌君駐馬春日妝梳妾斷腸不用城南使君壻
本求三十侍中郎何知漢帝好容色玉輦攜歸登建章
建章宮殿不知數萬戶千門深且長百堵椒塗接青瑣
九華閣道連洞房水晶簾箔雲母扇瑠璃窗牖玳瑁牀

歲歲年年奉歡宴嬌貴容華誰不羨恩情莫比陳皇后

寵愛全勝趙飛驚瑤房侍寢世莫知金屋更衣人不見

誰言一朝復一日君王棄世市朝變宮車出葬茂陵田

賤妾獨留長信殿一朝太子升至尊兩宮人事如掌翻

同時侍兒見讒毀後來新人莫一作不敢言兄弟印綬皆

被奪昔年賞賜不復存一旦放歸舊鄉里乘車垂淚還

入門父母慙我曾富貴嫁與西舍金玉孫念此翻覆復

何道百年盛衰誰能保憶昨尚如春日花悲今已作秋

時草少年去去莫停鞭人生萬事由上天非我今日獨
如此古今歇薄皆共然

吳宮怨

衛 萬

君不見吳王宮閣臨江起不卷珠簾見江水曉氣晴來
雙闕間潮聲夜落千門裏句踐城中非舊春姑蘇臺下
起黃塵祇今唯有西江月曾照吳王宮裏人

同前

張 籍

吳宮四面秋江水江清露白芙蓉死吳王醉後欲更衣

座上美人嬌不起
宮中千門復萬戶
君恩返覆誰能數
君心與妾既不同
徒向君前作歌舞
茱萸滿宮紅實垂
秋風裊裊生繁枝
姑蘇臺上夕燕罷
他人侍寢還獨歸
白日在天光在地
君今豈得長相棄

青樓曲二首

王昌齡

白馬金鞍從武皇
旌旂十萬宿長楊
樓頭小婦鳴箏坐
遙見飛塵入建章

馳道楊花滿御溝
紅妝綰綰上青樓
金章紫綬千餘里

夫壻朝回初拜侯

同前

于瀆

青樓臨大道一上一回老所思終不來極目傷春草

中流曲

崔國輔

歸時日尚早更欲向芳洲渡口水流急迴船不自由

聖壽無疆詞十首

楊巨源

文物京華盛謳歌國步康瑤池供壽酒銀漢麗宸章雨
露涵雙闕雷霆肅萬方代推仙祚遠春共聖恩長鳳宸

臨花暖龍鑪傍日香遙知千萬歲天意奉君王

鵷鷺彤庭際軒車綺陌前九城多好色萬井半祥烟人
醉逢堯酒鶯歌答舜弦花明御溝水香暖禁城天賜宴
文逾盛微歡物更妍無窮豔陽月長照太平年

雲陞臨黃道天門在碧虛大明含睿藻元氣抱宸居戈
偃征苗後詩傳宴鎬初年華富仙苑時哲滿公車化入
網緼大恩垂渙汗餘悠然萬方靜風俗揖華胥

玉漏飄青瑣金鋪麗紫宸雲山九門曙天地一家春瑞

霽方呈賞暄風本配仁巖廊開鳳翼水殿壓黿身文雅
逢明代歡娛及賤臣年年未央闕恩共物華新

垂拱乾坤正歡心品類同紫烟含北極玄澤付東風珠
綴留晴景金莖直曉空發生資盛德交泰讓全功間氣
登三事祥光啓四聰遐荒似川水天外亦朝宗

代是文明晝春當燕喜時鑪烟添柳重宮漏出花遲漢
典方寬律周官正採詩碧霄傳鳳吹紅旭在龍旂造化
膺神契陽和沃聖恩因隨百獸率舞奉丹墀

睿德符玄化芳情翊太和日輪皇鑒遠天仗聖朝多曙
色含金榜晴光轉玉珂中官陳廣樂元老進賡歌蓮葉
看龜上桐花識鳳過小臣空擊壤滄海是恩波

物象朝高殿簪裾溢上京春當九衢好天向萬方明樂
報簫韶發杯看沆瀣生芙蓉丹闕暖楊柳玉樓晴閭闔
開中禁衣裳儼太清南山同聖壽長獻鳳凰城

日上蒼龍闕香含紫禁林晴光五雲疊春色九重深賞
協元和德文垂雅頌音景雲隨玉輦顙氣在宸襟永保

無疆壽長懷不戰心聖朝多慶賜瓊樹粉牆陰
化洽生成遂功宣動植知瑞凝三秀草春入萬年枝鳳
掖嘉言進鵷行喜氣隨仗臨丹地近衣對碧山垂渥澤
方柔遠聰明本聽卑願同東觀士長覩漢威儀

朝元引四首

陳陶

帝燭熒煌下九天蓬萊宮曉玉鑪烟無央鸞鳳隨金母
來賀薰風一萬年

玉殿雲開露冕旒下方珠翠塵黿頭天鷄唱罷南山曙

春色光輝十二樓

萬寓靈祥擁帝居東華元老薦屠蘇
龍池遙望非烟拜五色瞳矐在玉壺

寶祚河宮一向清龜魚天篆益分明
近臣誰獻登封草五嶽齊呼萬歲聲

平蕃曲三首

劉長卿

吹角報蕃營迴軍欲洗兵已教青海外
自築漢家城渺渺戍烟孤茫茫塞草枯
隴闕何用閉萬里不防胡

絕漠大軍還平沙獨戍間空留一片石萬古在燕山

悲陳陶

杜甫

孟冬十郡良家子血作陳陶澤中水野曠天清無戰聲
四萬義軍同日死羣胡歸來血洗箭仍唱胡歌飲都市
都人回面向北啼日夜更望官軍至

悲青坂

我軍青坂在東門天寒飲馬太白窟黃頭奚兒日向西
數騎彎弓敢馳突山雪河水野蕭颼青是烽烟白人骨

焉得附書與我軍
忍待明年莫倉卒

哀江頭

少陵野老吞聲哭
春日潛行曲江曲
江頭宮殿鎖千門
細柳新蒲為誰綠
憶昔霓旌下南苑
苑中萬物生顏色
昭陽殿一作裏第一人
同輦隨君侍君側
輦前才人帶

弓箭白馬嚼齧黃金勒
翻身向天仰射雲一箭
正墜雙飛翼
明眸皓齒今何在
血污游魂歸不得
清渭東流劒閣深
去住彼此無消息
人生有情淚霑臆
江水江花豈

終極黃昏胡騎塵滿城欲往城南望城北

一作望南北

哀王孫

長安城頭頭白烏夜飛延秋門上呼又向人家啄大屋
屋底達官走避胡金鞭斷折九馬死骨肉不得同馳驅
腰下寶玦青珊瑚可憐王孫泣路隅問之不肯道姓名
但道困苦乞為奴已經百日竄荆棘身上無有完肌膚
高帝子孫盡隆準龍種自與常人殊豺狼在邑龍在野
王孫善保千金軀不敢長語臨交衢且為王孫立斯須

昨夜東風吹血腥東來橐駝滿舊都朔方健兒好身手
昔何勇銳今何愚竊聞天子已傳位聖德北服南單于
花門虜面請雪恥慎勿出口他人狙哀哉王孫慎勿疎
五陵佳氣無時無

兵車行

車辚辚馬蕭蕭行人弓箭各在腰爺娘妻子走相送塵
埃不見咸陽橋牽衣頓足攔道哭哭聲直上干雲霄道
傍過者問行人行人但云點行頻或從十五北防河便

至四十西營田去時里正與裏頭歸來頭白還戍邊邊

亭流血成海水武皇開邊意未已君不聞漢家山東二

百州千村萬落生荆杞縱有健婦把鋤犁禾生隴畝無

東西況復秦兵耐苦戰被驅不異犬與鷄長者雖有問

役夫敢申恨且如今年冬未休闕西卒

一云役夫心益憤如今縱得休

還為隴西卒

縣官急索租租稅從何出信知生男惡反是生

女好生女猶是嫁比隣生男埋沒隨百草君不見青海

頭古來白骨無人收新鬼煩冤舊鬼哭天陰雨濕聲啾

啾

來從竇車騎

李益

束髮逢世屯懷恩抱明義讀書良不武學劍慙非智遂
別魯諸生來從竇車騎追兵赴邊急絡馬黃金轡出入
燕南陲由來重意氣自經皋蘭戰又破樓煩地西北護
三邊東南留一尉時過如雲雨參差不自意將軍失恩
澤萬事從此異置酒高樓上薄暮秋風起長戟與我歸
歸來同棄置自酌還自飲非名又非利歌出易水寒琴

下雍門淚出逢平樂舊言在天階侍問我從軍苦自陳
少年貴大夫交四海從論身自致漢家不封侯蘇卿還
遠使我終此曲此曲成不易貴人難識心何由知忌
諱

憶長安曲二首

岑參

東望望長安正值日初出長安不可見但見長安日
長安何處在只在馬蹄下明日歸長安為君急走馬

九曲詞三首

高適

河圖曰黃河出崑崙山東北流千里折西而行至於蒲山南流千里至於華山之陰東流千里至於恒雍北流千里至於下津河水九曲長九千里入於渤海酈道元水經注曰黃河百里一小曲千里一曲一直矣新唐書曰天寶中哥舒翰攻破吐蕃洪濟大莫等城收黃河九曲以其地置洮陽郡遼由是作九曲詞

鐵騎橫行鐵嶺頭西看邏逆取封侯
青海只今將飲馬黃河不用更防秋

許國從來徹廟堂連年不為在疆場
將軍天上封侯印御史臺中異姓王

萬騎爭歌楊柳春千場對舞繡麒麟
到處盡逢歡洽事相看總是太平人

情人玉清歌

畢耀

洛陽城中有一人名玉清可憐玉清如其名
善踏斜柯能

獨立嬋娟花豔無人及
珠為裙玉為纓
臨春風吹玉笙
悠悠滿天星
萬金閣上晚妝成
雲和曲中為慢聲
玉梯不得踏
搖袂兩盈盈
城頭之日復何情

湘中弦二首

崔塗

烟愁雨細雲冥冥
杜蘭香老三湘清
故山望斷不知處
鸛鵲隔花啼一聲

蒼山遙遙江潏潏
路傍老盡無閒人
王孫不見草空綠
惆悵渡頭春復春

湘弦怨

孟郊

昧者理芳草蒿蘭同一鋤狂飈怒秋林曲直同一枯嘉
木忌深蠹哲人悲巧誣靈均入迴流靳尚為良謨我願
分衆泉清濁各異渠我願分衆巢衆鸞相遠居此志諒
難保此情竟何如湘弦少知意孤響空踟躕

湘弦曲

莊南傑

楚琴錚錚戛秋露巫雲雨脚飛朝暮古磬高敲百尺樓
孤猿夜哭千丈樹雲軒碾火聲瓏瓏連山卷盡長江空

鶯啼寂寞花枝雨
鬼嘯荒郊松柏風
滿堂怨咽悲相續
具調中含古離曲
繁弦響絕楚魂遙
湘山水碧天山綠
促促何促促
黃河九回曲
嫁與棹船郎
空牀將影宿
不道君心不如石
那教妾貌長如玉

促促詞

王建

促促復刺刺
水中無魚山無石
少年雖嫁不將歸
白頭猶著父母衣
四邊田宅非所有
我身不及逐鷄飛
出門

若有歸死處猛虎當衢向前去百年不遺踏君門在家
誰喚為新婦豈不見他鄰舍娘嫁來長在舅姑傍

同前

張籍

促促復促促家貧夫婦歡不足今年為人送租船去年
捕魚在江邊家中姑老子復小自織吳綃輸稅錢家家
桑麻滿地黑念君一身空努力乍教牛蹄團團羊角直
君身長在應不得

樓上女兒曲

盧仝

誰家女兒樓上頭指麾婢子掛簾鉤林花撩亂心之愁
卷却羅袖彈箜篌箜篌歷亂五六弦羅袖掩面啼向天
相思弦斷情不斷落花紛紛心欲穿心欲穿憑欄干相
憶柳條綠相思錦帳寒直緣感君恩愛一回顧使我雙
淚長珊珊我有嬌靨待君笑我有嬌蛾待君掃鴛花爛
熳君不來及至君來花已老心腸寸斷誰得知玉階暮
歷生青草


青青水中蒲三首

韓愈

青青水中蒲，下有一雙魚。
君今上隴去，我在與誰居。
青青水中蒲，長在水中居。
寄語浮萍草，相隨我不如。
青青水中蒲，葉短不出水。
婦人不下堂，行子在萬里。



樂府詩集卷九十一



總校官進士臣胡榮

校對官編修臣裴謙

謄錄監生臣范栩

欽定四庫全書薈要

集部

樂府詩集卷九十四

二至

詳校官候選知縣臣吳甸華



欽定四庫全書薈要卷一萬九千八百五

集部

樂府詩集卷九十二

宋 郭茂倩 編

新樂府辭

樂府雜題

塞上曲

李 白

大漢無中策匈奴犯渭橋五原秋草綠胡馬一何驕
命將征西極橫行陰山側燕支落漢家婦女無花色轉戰

渡黃河休兵樂事多蕭條清萬里瀚海寂無波

同前二首

王昌齡

蟬鳴桑樹間八月蕭關道出塞入塞雲處處黃蘆草從
來幽并客皆向沙場老莫學游俠兒矜誇紫騮好
邊頭何慘慘已葬霍將軍部曲皆相弔燕南代北聞功
勲多被黜兵馬亦尋分更遣黃龍戍唯當哭塞雲

同前

耿緯

慣習干戈事鞍馬初從少小在邊城身微久屬千夫長

家遠多親五郡兄
嬾說疆場曾大獲
且悲年鬢老長征
塞鴻過盡殘陽裏
樓上樓樓莫角聲

同前

司空曙

塞柳接胡桑軍門向大荒
幕營隨月魄兵氣長星芒
橫吹催春酒重裘隔夜霜
冰開不防敵青草滿遼陽

同前九首

僧貫休

幽并兒百萬百戰未曾輸
蕃界已深入將軍仍遠圖
月明風拔帳磧暗鬼騎狐
但有東歸日甘從筋力枯

中軍殺白馬白日祭蒼蒼號變旗幟亂輦乾草木黃朔
雲含凍雨枯骨放妖光故國今何處參差近鬼方

白雁兼羌笛幾年垂淚聽陰風吹殺氣永日在青冥遠
戍秋添將邊烽夜雜星嫖姚頭半白猶自看兵經

大雨始無塵邊聲四散聞浸河荒寨柱吹角白頭軍牛
馬隸腥草烏鳶識陣雲征人心力盡枯骨更遭焚

帳幕侵奚界憑陵未可涯擒生行別路尋箭向平沙赤
落蒲桃葉香微甘草花不堪登壠望白日又西斜

地角天涯外人號鬼哭邊大河流敗卒寒日下蒼煙殺
氣諸蕃動軍書一箭傳將軍莫惆悵高處是燕然
山接匈奴水河連勃勃城數州今已伏此命豈堪輕磧
吼旄頭落風乾刁斗清因嗟李陵苦只得沒蕃名
錦袷邊人黑如漆騎羊上水如箭疾蒲桃酒白鵬脂紅
苜蓿根甜沙鼠出單于右臂何須斷天子昭昭本如日
一握鬢髯一握絲須知只為平戎術

去年轉鬪陰山脚生得單于却放却今年深入於不毛

邊兵拔帳遺弓刀男兒貴展平生志為國輸忠合天地
甲穿雖則失黃金劍缺猶能生紫氣塞草萋萋兵士苦
戎虜如今勿戎虜封侯十萬始無心玉關生入君看取

同前二首

戎昱

漢將歸來北塞空旌旗初入玉關東高蹄戰馬三千匹
落日平原秋草中

邊風略地繞連山碎葉孤城未下關山頭烽子聲聲叫
知是將軍夜獵還

同前二首

王維

天驕遠塞行
鞘裏寶刀鳴
定是酬恩日
今朝覺命輕
塞外常為敵
邊風已報秋
平生多志氣
箭底覓封侯

同前

周朴

一墜風來一墜砂
有人行處沒人家
黃河九曲冰先合
紫塞三春不見花

同前

張祐

邊風卷地時
日暮帳初移
磧迴三通角
山寒一點旗
連

收搦索馬引滿射鵬兒莫道勲功細將軍昔戍師

塞上行

歐陽詹

聞說夷兵欲利秋昨來投筆到營州
驍雄已許將軍用邊塞無勞天子憂

同前

鮑溶

西風應時筋角堅承露牧馬水草冷
可憐黃河九曲盡氈館牢落胡無影

同前

李昌符

莽蒼盧關北孤城帳幕多客軍甘入陣老將望回戈樹
盡禽棲草水堅路在河汾陽尋下世羌塞肯先和

同前

周朴

秦築長城在連雲磧氣侵風吹邊草急角絕塞鴻沉世
世征人往年年戰骨深遼天望鄉者迴首盡霑襟

塞上

高適

東出盧龍塞浩然客思孤亭堠列萬里漢兵猶備胡邊
塵滿北溟戎騎正南驅轉鬬豈長策和親非遠圖惟昔

李將軍按節出皇都總戎掃大漠一戰擒單于常懷感
激心願効縱橫謨倚劍欲誰語關河空鬱紆

同前

王建

漫漫復淒淒黃沙莫漸迷人當故鄉立馬過舊營嘶斷
雁逢冰磧回軍占雪溪夜來山下哭應是送降奚

同前

鮑溶

朔風號薊門殺氣日夜興咸陽三千里鐵馬如飢鷹行
子久去鄉見山不敢登寒日慘大野塞雲若飛鵬西北

防秋軍麾幢宿層冰匈奴天未喪戰鼓長騰騰漢卒馬
上老樊纓空絲繩誠知天所驕欲罷又不能

同前

李端

二十在邊城軍中得第名卷旗收敗馬斷磧擁殘兵覆
陣烏鳶起燒山野火明塞間思遠獵師老厭分營雪嶺
無人跡冰河足雁聲李陵甘沒此惆悵漢公卿

同前

曹松

邊塞來處闊今日復明朝河凌

去聲堅通馬朝雲缺見鵬

沙中程獨泣鄉外隱誰招回首若經歲靈州生柳條

同前

鄭渥

出門何處問西東指畫翻為語論同到此客頭潛覺白
未秋山葉已飄紅帳前影落傳書雁日下聲交失馬翁
早晚回鞭復南去大衣高蓋漢鄉風

同前二首

譚用之

秋風漢北雁飛天單騎那堪遠賀蘭磧暗更無巖樹影
地平時有野燒瘢貂披塞色和衣冷劒佩胡霜隔匣寒

早晚橫戈似飛尉擁旄深入異田單

鉢略城邊日欲西遊人却憶舊山歸牛羊集水煙黏步
鵑鷄盤空雪滿圍獵騎靜逢邊氣薄戍樓寒對暮烟微
橫行總是男兒事早晚重來似漢飛

同前

姚合

磧路三千里黃雲覆草平戰須移死地軍諱殺降兵印
馬秋遮塞蒸砂夜築城故鄉歸未得都尉欠功名

同前

張喬

勒兵遼水邊風急卷旌旃絕塞寒無樹平沙勢蓋天雪
晴回探騎月落控鳴弦永定山河誓南歸改漢年

同前二首

周朴

柳色正沉沉風吹秋更深山河空遠道鄉國自鳴砧巷
有千家月人無萬里心長城哭崩後寂寞至如今
受降城必破回落隴頭移蕃道北海北謀生今始知

同前

秦韜玉

到處人皆著戰袍麾旗風急馬蹄勞黑山霜重弓添硬

青塚砂平月更高
大野幾重間雪嶺
長河無限舊風濤
鳳林關外皆唐土
猶尚蒐兵數似毛

同前

戴師顏

空磧晝蒼茫
沙腥古戰場
逢春多霰雪
生計在牛羊
冷角吹鄉淚
乾榆落夢牀
從來山水客
誰謂到漁陽

同前

江為

萬里寒雲凍不飛
磧煙烽火夜深微
邊兒移帳寒笳絕
雪路時聞探馬歸

同前二首

杜荀鶴

旌旗獵獵漢將軍
閒出巡遊帝命新
沙塞旋收饒帳幕
犬戎時殺少烟塵
冰河夜渡偷來馬
雪嶺朝飛獵去人
獨作書生疑不穩
軟弓輕劍也隨身

草白河水合蕃戎
出掠頻戍樓三號
火探騎一條塵戰
士風霜老將軍
雨露新封侯不由
此何以慰征人

塞下曲六首

李白

五月天山雪無花
祇有寒笛中間折
柳春色未曾看曉

戰隨金鼓宵眠抱玉鞍願將腰下劍直為斬樓蘭

天兵下北荒邊馬欲南飲橫戈從百戰直為銜恩甚握
雪海上食拂沙隴頭寢何當破月氏然後方高枕

駿馬如風颭鳴鞭出渭橋彎弓辭漢月插羽破天驕陣
解星芒盡營空海霧銷功成畫麟閣獨有霍嫖姚

白馬黃金塞雲砂繞夢思那堪愁苦節遠憶邊城兒螢
飛秋窗滿月度霜閨遲摧殘梧桐葉蕭颯沙棠枝無時
獨不見淚流空自知

塞敵乘秋下天兵出漢家將軍分虎竹戰士卧龍沙邊
月隨弓影胡霜拂劍花玉關殊未入少婦莫長嗟
烽火動沙漠連照甘泉雲漢皇按劍起還召李將軍兵
氣天上合鼓聲隴底聞橫行負勇氣一戰靜妖氛

同前

郭元振

塞外戰塵飛頻年出武威死生隨玉劍辛苦向金微久
戍人將老長征馬不肥仍聞酒泉郡已合數重圍

同前二首

王昌齡

飲馬渡秋水，水寒風似刀。平沙日未沒，黯黯見臨洮。昔

日長城戰

一作當日
龍城戰

咸言意氣高，黃塵是今古。

一作黃
沙滿今

古

白骨亂蓬蒿。

秋風夜渡河，吹却雁門桑。遙見邊地獵，羈馬宿嚴霜。五
道分兵去，孤軍百戰場。功多翻下獄，士卒但心傷。

同前二首

馬戴

旌旗倒北風，霜霰逐南鴻。夜救龍城急，朝焚塞帳空。骨
銷金鏃在，鬢改玉關中。却想羲皇代，無人說戰功。

廣漠雲凝慘日斜飛霰生燒山搜猛獸伏道擊回兵風
折旗竿曲沙埋樹杪

一作塞路

平黃雲飛旦夕偏奏苦寒聲

同前

張籍

邊州八月修城堡候騎先燒磧中草悲風吹沙度隴飛
隴頭林木無北枝將軍閱兵青塞下鳴鼓逢逢促獵圍
天寒山路石斷裂白日不銷帳上雪烏孫國亂多降胡
詔使名王持漢節年年征戰不得間邊人殺盡唯空山

同前

于瀆

赤子別父母犬戎圍邏娑戰鼓聲未齊烏鳶已相賀
燕然山上雲半是離鄉魂衛霍待富貴不知誰與論

同前

陶翰

進軍飛狐北窮寇勢將變落日沙塵昏背河更一戰
驛馬黃金勒彫弓白羽箭射殺左賢王歸奏未央殿
欲言塞下事天子不召見東出咸陽門哀哀淚如霰

同前二首

李益

蕃州部落能結束朝馳莫獵黃河曲燕歌未斷塞鴻飛

牧馬羣嘶邊草綠秦築長城城已摧漢武北上單于臺
古來征戰事不盡今日還復天兵來黃河東流流九折
沙場埋恨何時絕蔡琰沒處造胡笳蘇武歸來持漢節
為報如今都護雄匈奴旦莫下雲中請書塞北陰山石
願勒燕然車騎功

漢家今上郡秦塞古長城有日雲長慘無風沙自驚當
今聖天子不戰四夷平

樂府詩集卷九十二

欽定四庫全書薈要卷一萬九千八百六

集部

樂府詩集卷九十三

宋 郭茂倩 編

新樂府辭

樂府雜題

塞下曲十一首

僧貫休

下營依遁甲分師把河隍地使人心惡風吹旗燄荒搜
山見探卒放火獵黃羊唯有南飛雁聲聲斷客腸

歸去是何年山連邏迤川蒼黃曾戰地空濶養鵬天旗
插蒸沙堡槍擔卓梨泉蕭條寒日落號令徹窮邊

邊寇日相持如龍馬不肥突圍金甲破趨賊鐵槍飛漢
月堂堂上塞雲慘慘微黃河水已合猶未送征衣

南北唯堪恨東西實可嗟常飛侵夏雪何處有人家風
刮陰山薄河推大岸斜只應寒夜夢時見故園花

不是將軍勇邊兵豈易當雨曾淋火陣箭又中金瘡鐵
嶺全無土豺羣亦有狼因思無戰日天子是陶唐

榆葉飄蕭盡關防烽寨重寒來知馬疾戰後覺人凶燒
逐飛蓬死沙生毒霧濃誰能奏明主功業已堪封

萬戰千征地蒼茫古寨門陰兵為客崇惡酒發刀痕風
落崑崙食河萌苜蓿根將軍更移帳日日近西蕃

古塞腥膻地驕兵聚如蠅寒鷗中髀石落在黃河水蒼
茫邏逤城枿枿賊氣興鑄金禱秋穹還擬相憑陵

戰骨踐成塵飛入征人目黃雲忽變黑戰鬼作陣哭陰
風吼大漠火號出不得誰為天子前唱此邊城曲

日向平沙出還向平沙沒飛蓬落陣營驚雕去天末帝
鄉青樓倚霄漢歌吹掀天對花月豈知塞上望鄉人日
日雙眸滴清血

狼烟作陣雲匈奴愛輕敵領兵不知數牛羊復吞磧嚴
冬大河枯嫖姚去深擊戰血染黃沙風吹映天赤

同前六首

盧綸

驚翎金僕姑燕尾繡螭弧獨立揚新令千營共一呼
林暗草驚風將軍夜引弓平明尋白羽沒在石稜中

月黑雁飛高，單于夜遁逃。
欲將輕騎逐，大雪滿弓刀。
野幕蔽瓊筵，羌戎賀勞旋。
醉和金甲舞，雷鼓動山川。
調箭又呼鷹，俱聞出世能。
奔狐將迸雉，掃盡古丘陵。
亭亭七葉貴，蕩蕩一隅清。
他日題麟閣，唯應獨不名。

同前二首

僧皎然

寒塞無因見，落梅邊人吹入。
笛聲來勞勞亭上，春應度
夜夜城南戰未回。

都護今年破武威，胡沙萬里鳥空飛。
旂竿瀚海掃雲出，

氍騎天山踏雪歸

同前

李賀

畫角引北風，薊門白於水。
天含青海道，城頭見千里。
露下旗濛濛，寒金鳴夜刻。
蕃甲鏢蛇鱗，馬嘶青塚白。
秋靜是旄頭，沙遠席箕愁。
帳北天應盡，河聲出塞流。

同前

劉駕

勒兵遼水邊，風急卷旌旃。
旃絕塞陰無草，平沙去盡天下營。
看斗建，傳號信，狼烟聖代書青史。
當時破敵年。

同前二首

王維

辛勤幾出黃花戍，迢遞初隨細柳營。
塞晚每愁殘月苦，邊秋更逐斷蓬驚。

年少辭家從冠軍，金裝寶劍去邀勲。
不知馬骨傷寒水，唯見龍城起暮雲。

同前二首

令狐楚

雪滿衣裳冰滿鬚，曉隨飛將伐單于。
平生志氣今何在，把得家書淚似珠。

邊草蕭條塞雁飛
征人南望盡
霜衣黃塵滿
面長須戰
白髮生頭未得歸

同前五首

張仲素

三戍漁陽再渡遼
驂弓在臂劍橫腰
匈奴欲似知名姓
休傍陰山更射鵰

獵馬千羣雁幾雙
燕然山下碧油幢
傳聲漠北單于破
火照旌旗夜受降

朔雪飄飄開雁門
平沙歷亂卷蓬根
功名恥計擒生數

直斬樓蘭報國恩

隴水潺湲隴樹秋
征人到此淚雙流
鄉關萬里無因見
西戍河源早晚休

陰磧茫茫塞草腓
桔槔烽上暮烟飛
交河北望天連海
蘇武曾將漢節歸

同前六首

戎昱

慘慘寒日沒
北風卷蓬根
將軍領疲兵
却入古塞門
回頭指陰山
殺氣成黃雲

上山望邊兵邊馬馳驟速黃河冰已合意又向南牧嫖
姚夜出軍霜雪割人肉

塞北無草木烏鳶巢僵屍決滸沙漠空終日朔風吹戰
卒多苦辛苦辛無四時

晚渡西海西向東看日沒傍岸砂礫堆半和戰兵骨單
于竟未滅陰氣常勃勃

城上畫角哀則知兵辛苦試問左右人無言淚如雨何
意休明時終年事鼙鼓

北風凋白草驕騎日駸駸夜後戍樓月秋來邊將心鐵
衣霜露重戰馬歲年深自有盧龍塞烟塵飛至今

同前

丁 稜

北風鳴晚角雨雪塞雲低烽舉戰軍動天寒征馬嘶出
營紅旆展過磧暗沙迷諸將年皆老何時罷鼓鼙

同前

郎士元

寶刀塞上兒身經百戰曾百克壯心竟未嫖姚知白草
山頭日初沒黃沙戍下悲歌發蕭條夜靜邊風吹獨倚

營門望秋月

同前

許渾

夜戰桑乾雪秦兵半不歸朝來有鄉信猶自寄征衣

同前

周朴

石國胡兒向磧東愛吹橫笛引秋風夜來雲雨皆飛盡
月照平沙萬里空

同前二首

張祜

二十逐嫖姚分兵遠戍遼雪迷經塞夜冰壯渡河朝促

放鵬難下生騎馬未調小儒何足問看取劒橫腰
萬里配長陁連年慣野營入羣來揀馬拋伴去擒生箭
插雕翎闊弓盤鵲角輕問看行遠近西去受降城

塞下

李宣遠

秋日并州路黃榆落故關孤城吹角罷數騎射鵬還帳
幕遙臨水牛羊自下山行人正垂淚烽火起雲間

同前三首

沈彬

塞葉聲悲秋欲霜寒山數點下牛羊映霞旅雁隨疎雨

向磧行人帶夕陽
邊騎不來沙路失
國恩深後海城荒
胡兒向化新成長
猶自千回問漢王

貴主和親殺氣沉
燕山間獵鼓輦音
旗分雪草偷邊馬
箭入寒雲落塞禽
隴月盡牽鄉思動
戰衣誰寄淚痕深
金釵謾作封侯別
擘破佳人萬里心

月冷榆關過雁行
將軍寒笛老思鄉
貳師骨恨千夫壯
李廣魂飛一劍長
戍角就沙催落日
陰雲分磧護秋霜
誰知漢武輕中國
間奪天山草木荒

交河塞下曲

胡曾

交河水薄日遲遲
漢將思家感別離
塞北草生蘇武泣
隴西雲起李陵悲
曉侵雉堞烏先覺
春入關山雁獨知
何處疲兵心最苦
夕陽樓上笛聲時

汾陽行

李嶠

君不見昔日西京全盛時
汾陽后土新祭祠
齊宮宿寢設儲供
撞鐘鳴鼓樹羽旗
漢家五世才且雄
賓筵萬靈服
九戎柏梁賦詩高宴罷
詔書法駕幸河東
河東太守

親掃除奉迎至尊導鑾輿五營將校列容衛三河縱觀

空里閭回旌駐驛降靈場焚香奠醑邀百祥金鼎發色

正焜煌靈祇煒煜攄景光埋玉陳牲禮神畢舉麾上馬

乘輿出彼汾之曲嘉可游木蘭為檝桂為舟擢歌徵吟

綵鷁浮簫聲哀鳴白雲秋歡娛宴洽賜羣后家家復除

戶牛酒聲明動天樂無有千秋萬歲南山壽自從天子

向秦關玉輦金車不復還珠簾羽帳長寂寞鼎湖龍髯

安可攀千齡人事一朝空四海為家北路窮雄豪意氣

今何在壇場官館盡蒿蓬
路逢故老長歎息世事回環不
可測昔時青樓對歌舞今日黃埃聚荆棘山川滿目淚沾
衣富貴榮華能幾時不見只今汾水上唯有年年秋雁飛

大梁行

唐堯客

客有成都來為我彈鳴琴前彈別鶴操後奏大梁吟大
梁傷客情荒臺對古城版築有陳迹歌吹無遺聲雄哉
魏公子疇日好羅英秀士三千人煌煌象列星金槌奪
晉鄙白刃刎侯嬴邯鄲救趙北函谷走秦兵君子榮且

昧忠信莫之明間諜忽來及雄圖靡克成千齡萬化盡
但見榮與清舊國多狐兔夷門荆棘生蒼梧彩雲沒汜
浦綠池平聞有東山去蕭蕭班馬鳴河洲塞宿莽日夕
淚沾纓因之唁公子慷慨此歌行

同前

高適

古城莽蒼饒荆榛驅馬荒城愁殺人魏王宮觀盡禾黍
信陵賓客隨灰塵憶昔雄都舊朝市軒車照一作曜歌

鐘起軍容帶甲三十萬國步連營一千里金盛須臾那

可論高臺曲池無復存遺墟但見狐狸跡古地空多

一作

餘草木根莫天搖落傷懷抱撫劒悲歌對秋草俠客猶
傳朱亥名行人尚識夷門道白壁黃金萬戶侯寶刀駿
馬填山丘年代淒涼不可問往來唯見水東流

洛陽行

張籍

洛陽宮闕當中州城上我我十二樓翠華西去幾時返
梟巢乳鳥藏蟄驚御門空鑰五十年稅彼農夫修玉殿
六街朝莫鼓鼙禁兵持戟守空宮百官月月謝拜表

驛使相續長安道上陽宮樹黃復綠野豺入苑食麋鹿
陌上老翁雙淚垂共說武皇巡幸時

永嘉行

晉書曰懷帝永嘉五年六月劉曜王彌陷
洛陽入於南宮升太極前殿縱兵大掠悉
收宮人珍寶曜於是害諸王公及百官已
下三萬餘人遷帝於平陽劉聰以帝為會
稽公按劉元海本匈奴冒頓之後曜其族

子也

黃頭鮮卑入洛陽
囂然持戟昇明堂
晉家天子作降士
公卿齊走如牛羊
紫陌旌旛暗相觸
家家鷄犬驚上屋
婦人出門隨亂兵
夫死眼前不敢哭
九州諸侯自曠土
無人領兵來護主
北人避患多在南
南人至今能晉語

田家行

王建

男聲欣欣女顏悅
人家不怨言語別
五月雖熟麥風清
簷頭索索縲車鳴
野蠶作繭人不取
葉間撲撲秋蛾生

麥收上場絹在軸的知輸得官家足不願

一作望

入口復

上身且免向城賣黃犢田家衣食無厚薄不見縣門身
即樂

同前

元稹

牛吒吒田确确旱塊敲牛蹄趵趵種得官倉珠顆穀六
十年來兵簇簇日月食糧車轆轤一日官軍收海服驅
牛駕車食羊肉歸來收得牛兩角重鑄樓犁作斤斲姑
舂婦擔輸官不足歸賣屋願官早勝讎早覆農死有兒

牛有犢不遣官軍糧不足

思遠人

王建

妾思常懸懸君行復綿綿
征途向何處碧海與青天
歲久自有念誰令長在邊
少年若不歸蕭室如黃泉

同前

張籍

野橋春水清橋上送君行
去去人應老年年草自生
出門看遠道無信向邊城
楊柳別離處秋蟬今復鳴

憶遠曲

水上山沉沉征途渡遠林途荒人行少馬跡猶可尋雪
中獨立樹海口失侶禽誰愛如長綿千里縈我心

同前

元稹

憶遠曲郎身不遠郎心遠沙隨郎飯俱在匙郎意看沙
那比飯水中畫字無字痕君心暗畫誰會君况妾事姑
姑進止身去門前同萬里一家盡是郎腹心妾似生來
無兩耳妾身何足言聽妾私勸君君今夜夜醉何處姑
來伴妾自閉門嫁夫恨不早養兒將備老妾自嫁郎身

骨立老姑為郎求娶妾不忍見姑郎忍見為郎忍耐
看姑面

望遠曲

孟郊

朝朝候歸信日日登高臺行人未去植庭梅別來三見
庭花開庭花開盡復幾時春光駘蕩阻佳期愁來望遠
烟塵隔空憐綠鬢風吹白何當歸見遠行客

夫遠征

元稹

趙卒四十萬盡為坑中鬼趙王未信趙母言猶點新兵

更填死填死之兵其氣索秦彊趙破括敵起括雖專命
起尚輕何況牽肘之人牽不已坑中之鬼妻在營壘麻
戴經鵠雁鳴送夫之婦又行哭哭聲送死非送行夫遠
征遠征不必成長城出門便不知死生

樂府詩集卷九十三

欽定四庫全書薈要卷一萬九千八百七

集部

樂府詩集卷九十四

宋 郭茂倩 編

新樂府辭

樂府雜題

寄遠曲

王建

美人別來無處所
巫山月明湘江雨
千回想見不分明
井底看星夢中語
兩心相對尚難知
何況萬里不相疑



同前

張籍

美人去來春江暖江頭無人湘水滿浣沙石上水禽棲
江南路長春日短蘭舟桂楫常渡江無因重寄雙瓊璫

征婦怨四首

孟郊

良人昨日去明月又不圓別時各有淚零落青樓前
君淚濡羅巾妾淚滿路塵羅巾去在手今得隨妾身路
塵如因風得上君車輪

生在絲羅下不識漁陽道良人自成來夜夜夢中到

漁陽千里道近如中門限中門踰有時漁陽長在眼

同前

張籍

九月匈奴殺邊將漢軍全歿遼水上萬里無人收白骨
家家城下招魂奠婦人依倚子與夫同居貧賤心亦舒
夫死戰場子在腹妾身雖存如畫燭

織婦詞

孟郊

夫是田中郎妾是田中女當年嫁得君為君秉機杼筋
力日已疲不息窓下機如何織紵素自著藍縷衣官家

勝村路更索栽桑樹

同前

元稹

織婦何太忙蠶經三卧行欲老蠶神女聖早成絲今年
絲稅抽徵早早徵非是官人惡去歲官家事戎索征人
戰苦束刀槍主將勲高換羅幕縹絲織帛猶努力變縹
撩機苦難織東家頭白雙女兒為解挑紋嫁不得簷前
裊裊游絲上上有蜘蛛巧來往羨他蟲豸解緣天能向
虛空織羅網

同前

鮑溶

百日織綵絲一朝停杼機機中有雙鳳化作天邊衣使
人馬如風誠不阻音徽影響隨羽翼雙雙繞君飛行人
豈願行不怨不知歸所怨天盡處何人見光輝

織錦曲

王建

大女身為織錦戶名在縣家供進簿長頭起樣呈作官
聞道官家中苦難回花側葉與人別惟恐秋天絲線乾
紅縷葳蕤紫茸軟蝶飛參差花宛轉一梭聲盡重一梭

玉腕不停羅袖卷
窓中夜久睡髻偏
橫釵欲墮垂著肩
合衣卧時參沒後
停燈起在雞鳴前
一匹千金亦不賣
限日未成官裏怪
錦江水涸貢轉多
宮中盡著單絲羅
莫言山積無盡日
百尺高樓一曲歌

織錦詞

溫庭筠

丁東細漏侵瓊瑟
影轉高梧月初出
簇藪金梭萬縷紅
鴛鴦豔錦初成匹
錦中百結皆同心
葉亂雲盤相間深
此意欲傳傳不得
玫瑰作柱朱弦琴
為君裁破合歡被

星斗迢迢共千里象尺薰爐未覺秋碧池中一作有新

蓮子

當窻織

王建

梁橫吹曲折楊柳曰門前一株棗歲歲不
知老阿婆不嫁女那得孫兒抱唧唧復唧
唧女子臨窻織不聞機杼聲只聞女歎息
當窻織其取諸此

歎息復歎息園中有棗行人食貧家女為富家織父母

隔牆不得力水寒手澀絲脆斷續來續去心腸爛草蟲
促促機下啼兩日催成一匹半輸官上頭有零落姑未
得衣身不著當窻却羨青樓倡十指不動衣盈箱

擣衣曲

班捷好擣素賦曰廣儲縣月暉木流清桂
露朝滿涼衿夕輕改容飾而相命卷霜帛
而下庭於是投香杵加紋砧擇鸞聲爭鳳
音又曰調無定律聲無定本任落手之參

之近遠或連躍而更投或暫舒而長卷蓋
言擣素裁衣緘封寄遠也

月明中庭擣衣石掩帷下堂來擣帛婦姑相對初力生
雙揎白腕調杵聲高樓敲玉節會成家家不睡皆起聽
秋天丁丁復凍凍玉釵低昂衣帶動夜深月落冷如刀
溼著一雙纖手痛回編易裂看生熟鴛鴦紋成水波曲
重燒熨斗帖兩頭與郎裁作迎寒裘

同前

劉禹錫

爽砧應秋律繁杵含淒風一一遠相續家家音不同戶
庭凝露清伴侶明月中長裾委襞積輕珮垂璁瓏汗餘
衫更馥鈿移麝半空報寒驚邊雁促思聞候蟲天狼正
芒角虎落定相攻盈篋寄何處征人如轉蓬

送衣曲

王建

去秋送衣渡黃河今秋送衣上隴坂婦人不知道徑處
但聞新移軍近遠半年著道經雨濕開籠見風衣領急
舊來十月初點衣與郎著向營中集絮時厚厚綿纂纂

貴欲征人身上暖願卽莫著裏屍歸願妾不死長送衣

寄衣曲

張籍

織素縫衣獨苦辛遠因回使寄征人官家亦自寄衣去
貴從妾手看君身高堂姑老無侍子不得自到邊城裏
殷勤爲看初著時征夫身上宜不宜

淮陰行五首

劉禹錫

劉禹錫序曰古有長干行備言三江之事

禹錫阻風淮陰乃作淮陰行

簇簇淮市行竹樓緣岸上好日起檣竿鳥飛驚五兩
今日轉船頭金烏指西北煙波與春草千里同一色
船頭大銅鑲摩挲光陳陳早晚使風來沙頭一眼認
何物令儂羨羨郎船尾燕銜泥起檣竿宿食長相見
隔浦望行船頭昂尾幟幟無奈脫葉時清淮春浪軟

秦娘歌

劉禹錫歌序曰秦娘本韋尚書家工謳者
初尚書為吳郡得之命樂工教以琵琶歌

舞盡得其技後攜之歸京師京師多善工
又捐去故技授以新聲而秦娘頗見稱於
貴遊間元和初尚書亮於東都秦娘出居
民間久之為蘄州刺史張憇所得其後憇
坐事謫武陵郡憇卒秦娘無所歸地遠無
有知其容與藝者故日抱樂器而哭其音
甚悲禹錫聞之乃作秦娘歌云

秦娘家本閭門西門前淶水環金堤有時妝成好天氣

走上臯橋折花戲風流太守韋尚書路傍忽見停隼旗
斗量明珠烏傳意紺幘迎入專城居長髮如雲衣似霧
錦茵羅薦承輕步舞學驚鴻水榭春歌傳一作掠上客蘭

堂莫從郎西入帝城中貴遊簪組香簾櫳低鬟緩視抱
明月纖指破撥生胡風繁華一旦有消歇題劍無光履
聲絕洛陽舊宅生草萊杜陵蕭蕭松柏哀妝奩蟲網厚
如蠶博山鑪側傾寒灰蘄州刺史張公子白馬新到銅
駝里自言買笑擲黃金月墮雲收從此始安知鵬鳥坐

隅飛寂寞旅魂招不歸秦嘉鏡有前時結韓壽香銷故
篋衣山城少人江水碧斷雁哀猿風雨夕朱絃已絕為
知音雲鬢未秋私自惜舉目風煙非舊時夢尋歸路多
參差如何將此千行淚更灑湘江斑竹枝

更衣曲

漢武帝故事曰武帝立衛子夫為皇后初
上行幸平陽主家主置酒作樂子夫為主
謳者善歌能造曲每歌桃上上意動起更

衣子夫因侍得幸頭解上見其美髮悅之
主遂納子夫於宮更衣曲其取於此

博山烟烟吐香霧紅燭引至更衣處夜如何其夜漫漫
鄰雞未鳴寒雁度庭前雪壓松桂叢廊下點點懸紗籠
蒲堂醉客爭笑語嘈囋琵琶青幕中

視刀環歌

常恨言語淺不如人意深今朝兩相視脉脉萬重心

提上行三首

古今樂錄曰清商西曲襄陽樂云朝發襄
陽城莫至大堤宿大堤諸女兒花艷驚郎
目梁簡文帝由是有大堤曲堤上行又因
大堤曲而作也

酒旗相望大堤頭堤下連檣堤上樓日暮行人爭渡急
槳聲呖軋滿中流

江南江北望烟波入夜行人相應歌桃葉傳情竹枝怨
水流無限月明多

長堤繚繞水

一作太

徘徊酒舍旗亭次第開日晚上簾招

賈客軻義大艣落帆來

競渡曲

劉異事始曰楚傳云競渡起於越王勾踐荆
楚歲時記云舊傳屈原死於汨羅時人傷之
競以舟楫拯焉因以成俗歲華紀麗云因勾
踐以成風拯屈原而為俗是也劉禹錫序曰
競渡始於武陵至今舉楫而相和之音咸呼

何在招屈之義也競渡曲蓋起於此

沅江五月平堤流邑人相將浮綵舟靈均何年歌已矣
哀謠振楫從此起揚枹擊節雷闐闐亂流齊進聲轟然
蛟龍得雨鬣鬣動蟠螭飲河形影聯刺史臨流褰翠幃
揭竿命爵分雄雌先鳴餘勇爭鼓舞未至銜枚顏色沮
百勝本自有前期一飛由來無定所風俗如狂重此時
縱觀雲委江之湄綵旂夾岸照鮫室羅襪凌波呈水嬉
曲終人散空愁莫招屈亭前水東注

沓潮歌

劉禹錫歌序曰元和十年夏五月大風駕
潮南海泛溢南人云沓潮也率三歲一有
之客或言其狀禹錫因歌之

屯門積日無迴颿滄波不歸成沓潮轟如鞭石矻且搖
虛空欲駕鼉鼉橋驚湍慶縮悍而驕大陵高岸失岩堯
四邊無阻音響調背負元氣掀重霄介鯨得性方逍遙
仰鼻噓吸揚朱翹海人狂顧迭相招蜀衣髻首聲嘒嘒

征南將軍登麗譙赤旗指麾不敢囂翌日風迴沴氣消
歸濤納納景昭昭烏泥白沙復滿海海色不動如青瑤

北邙行

王建

晉張協登北邙賦曰陟巖丘之巖岫升逶迤之修坂回余車於峻嶺聊送目於四遠
伊洛混而東流帝居赫以崇顯於是徘徊
絕嶺踟躕步趾前瞻狼山卻闕大岯東眺
虎牢西睨熊耳邪亘天際旁極萬里莽眈

眼以茫昧諒羣形之維紀爾乃地勢窅隆
丘墟陂陀墳隴畎壘基布星羅松林慘映
以攢列玄木搜寥而振柯壯漢氏之所營
望五陵之鬼竅後漢書曰光武葬於原陵
帝王世紀曰原陵在臨平亭東去洛陽十
五里朱超石與兄書曰登北邙遠眺衆美
都盡且言光武墳邊杏甚美即原陵蓋在
北邙也魏志曰明帝欲平北邙令登臺觀

見孟津廷尉卒毗諫止之按北邙行言人
死葬北邙與梁甫吟泰山吟蒿里行同意

北邙山頭少間土盡是洛陽人舊墓舊墓人家歸葬多
堆著黃金無置處天涯悠悠葬日促岡岨崎嶇不停轂
高張素幕繞銘旌夜唱挽歌山下宿洛陽城北復城東
一作城西魂車祖馬長相逢車轍廣若長安路蒿草少
并城東

於松柏樹山頭澗底石漸稀盡向墳前作羊虎誰家石
碑文字滅後人重取書年月朝朝車馬送葬回還起大

宅與高臺

同前

張籍

洛陽北門北邙道喪車磷磷入秋草
車前齊唱薤露歌
高墳新起白
我我朝朝莫莫長送葬
洛陽城中人更多
千金立碑高百尺
終作誰家柱下石
山頭松柏半無主
地下白骨多於土
寒食家家送紙錢
鴟鵂作窠銜上樹
人居朝市未解愁
請君暫向北邙遊

野田行

李益

日沒出古城野田何茫茫寒狐上孤塚鬼火燒白楊昔
人未為泉下客行到此中曾斷腸

同前

張碧

風昏晝色飛斜雨冤骨千堆髑髏語八紘牢落人物悲
是箇田園荒廢主悲嗟自古爭天下幾度乾坤復如此
秦皇矻矻築長城漢祖區區白蛇死野田之骨兮又成
塵樓閣風煙兮還復新願得華山之下長歸馬野田無
復堆冤者

斜路行

長安有狹斜行曰長安有狹斜道隘不容
車斜路行其義亦同

世間娶容非

一作不

娶婦中庭牡丹勝松樹九衢大道人

不行走馬奔車逐斜路斜路行熟直路荒東西豈是

一作

不橫太行南樓彈弦北戶舞行人到此多徊

一作仿

徨頭


白如絲面如蠟亦學少年行不返縱令自解思故鄉輪
折蹄穿白日晚誰將古曲換斜音回取行人斜路心

雉將雛

雉咿喔雛出殼毛斑斑背啄啄學飛未得一尺高還逐
母行旋母脚麥壟淺淺難蔽身遠去戀雛低怕人時時
土中鼓兩翅引雛拾蟲不相離



樂府詩集卷九十四



總校官進士臣胡榮

校對官庶吉士臣徐如澍

謄錄監生臣丁湘錦

欽定四庫全書薈要

集部

樂府詩集卷九十五

七

詳校官候選知縣臣吳甸華



欽定四庫全書薈要卷一萬九千八百八集部

樂府詩集卷九十五

宋 郭茂倩 編

新樂府辭

樂府雜題

長安霸旅行

孟郊

十日一理髮每梳飛旅塵
三旬九過飲每食唯舊貧
萬物皆及時獨余不覺春
失名誰肯訪得意爭相親
直木

有恬翼靜流無躁鱗始知喧競場莫處君子身野策藤
竹輕山疏薇蕨新潛歌歸去來事外風景真

羈旅行

張籍

遠客出門世路難停車斂策在門端荒城無人雪滿路
火燒野橋不得度寒蟲入窟鳥歸巢僮僕問我誰家去
行尋田頭暗未息雙轂長轆礙荆棘綠崗入澗投田家
主人舂米為夜食晨雞喔喔茆屋傍行人起掃車上霜
舊山已別行已遠身計未成難復返長安陌上相識稀

遙望天門白日晚誰能聽我苦辛行為向君前歌一聲

求仙曲

孟郊

仙教生為門仙宗靜為根持心苦妄求服食安足論鑿
惑有靈藥餌真成本源自當出塵網馭鳳升崑崙

求仙行

張籍

漢皇欲作飛仙子年年採藥東海裏蓬萊無路海無邊
方士舟中相就死招搖在天因白日甘泉玉樹無仙實
九皇真人終不下空向離宮祠太一丹田有氣凝素華

君能保之昇絳霞

結愛

孟郊

心心復心心結愛務在深
一度欲離別千回結衣襟
結妾獨守志結君早歸意
始知結衣裳不如結心腸
坐結行亦結結盡百年月

節婦吟

張籍

君知妾有夫贈妾雙明珠
感君纏綿意繫在紅羅襦
妾家高樓連苑起良人執戟明光裏
知君用心如日月事

夫誓擬同生死還君明珠雙淚垂何不相逢未嫁時

楚宮行

章華宮中九月時桂花半落紅橘垂江頭騎火照輦道
君王夜從雲夢歸霓旌鳳蓋到雙闕臺上重重歌吹發
千門萬戶開相當燭籠左右列成行下輦更衣入洞房
洞房侍女盡焚香玉階羅幕微有霜齊言此夕樂未央
玉酒湛湛盈華觴絲竹次第鳴中堂已姬起舞向君王
回身垂手結明璫願君千年萬年壽朝出射麋夜飲酒

山頭鹿

山頭鹿角芟芟尾促促貧兒多租輸不足夫死未葬兒
在獄早自熬熬蒸野崗禾黍不收無獄糧縣家惟憂少
年食誰能令爾無死傷

各東西

遊人別一東復一西出門相背兩不返惟信車輪與馬
蹄道路悠悠不知處山高海濶誰辛苦遠遊不定難寄
書日日空尋別時語浮雲上天雨墮地暫時會合終離

異我今與子非一身安得死生不相棄

湘江曲

湘水無潮秋水濶湘中月落行人發
行人發送人歸白蘋茫茫鷓鴣飛

雀飛多

雀飛多觸網羅網羅高樹山顛汝飛蓬蒿下勿復投身
網羅間粟積倉木在田巢之雛望其母來還

夢上天

元稹

夢上高高天。高天蒼蒼高不極。下視五嶽塊。纍纍仰天。
依舊蒼蒼色。踏雲聳身身。更上攀天上。天攀未得西瞻。
若木兔輪低。東望蟠桃海波黑。日月之光不到此。非暗。
非明。煙塞塞天。悠地遠身。跨風下無階梯。上無力來時。
畏有他人上。截斷龍胡斬鵬翼。茫茫漫漫方自悲。哭向。
青雲搗素臆。哭聲厭咽旁人惡。喚起驚悲淚飄露。千慙。
萬謝喚厭人。向使無君終不寤。

君莫非

鳥不解走獸不解飛兩不相解那得相譏犬不飲露蟬
不啖肥以蟬易犬蟬死犬饑燕在梁棟鼠在階基各自
窠窟不能改移婦好針縷夫讀書詩男翁女嫁卒不相
知懼聾摘耳効痛頰眉我不非爾爾無我非

田頭狐兔行

種豆耘鋤種禾溝畝禾苗豆甲狐搯兔翦割鵠餒鷹烹
麟啖犬鷹怕兔毫犬被狐引狐兔相須鷹犬相盡日暗
天寒禾稀豆損鷹犬就烹狐兔俱晒

人道短

古道天道長人道短我道天道短人道長天道晝夜回
轉不曾住春秋冬夏忙顛風暴雨電雷狂晴被陰暗月
奪日光往往星宿日亦堂堂天既職性命道德人自彊
堯舜有聖德天下能遣壽命永昌泥金刻玉與秦始皇
周公傳說何不長宰相老聃仲尼何事栖遑莽卓恭顯
皆數十年貴富梁冀夫婦車馬煌煌若此顛倒事豈非
天道短豈非人道長堯舜留得神聖事百代天子有典

章仲尼留得孝順語千年萬歲父子不敢相滅亡沒後
千餘載唐家天子封作文宣王老君留得五千字子孫
萬萬稱聖唐諡作玄元帝魂魄坐天堂周公周禮十二
卷有能行者知紀綱傳說說命三四紙有能師者稱祖
宗天能天人命人使道無窮若此神聖事誰道人道短
豈非人道長天能種百草猶得十年有氣息舜纔一日
芳人能揀得丁沈蘭蕙料理百和香天解養禽獸餒虎
豹豺狼人解和麴孽充禴祀丞嘗杜鵑無百作天遣百

鳥哺雛不遣哺鳳凰巨蟒壽千歲天遣食牛吞象充腹
腸蛟螭與變化鬼怪與隱藏蚊蚋與利觜枳棘與鋒鋟
賴得人道有揀別信任天道真茫茫若此撩亂事豈非
天道短賴得人道長

苦樂相倚曲

古來苦樂之相倚近於掌上之十指君心半夜猜恨生
荊棘滿懷天未明漢皇一作眼瞥飛燕時可憐班女思
已哀未有因由相決絕猶得半年佯暖熱轉將深意喻

旁人緝綴疵瑕遣潛說一朝詔下辭金屋班姬自痛何
倉卒呼天撫地將自明不悟尋時暗一作銷骨白首宮
人前再拜願將日月相揮解苦樂相尋晝夜間燈光那
得天明在主今被奪心應苦妾奪深思初為主欲知妾
意恨主時主今為妾思量取班姬收淚抱妾身我曾排
擯無限人

捉捕歌

捉捕復捉捕莫捉狐與兔兔藏窟穴豺狼妨道路道

路非不妨最憂螻蟻聚豺狼不陷穿螻蟻潛幽壺切切
主人窓主人輕細故延緣蝕藥櫺漸入棟梁柱梁棟盡
空虛攻穿痕不露主人坦然意晝夜安寢寤網羅布參
差鷹犬走回互盡力窮窟穴無心自還顧客來歌捉捕
歌竟淚如雨豈是惜狐兔畏君先後悞願君掃梁棟莫
遣螻蟻附次及清道途盡滅豺狼步主人堂上坐行客
門前度然後巡野田遍張畋獵具外無梟獍援內有熊
羆驅狡兔掘荒榛妖狐熏古墓用力不足多得禽自無

數畏君聽未詳聽客有明喻蟻虱誰不輕鯨鯢誰不惡
在海尚幽遐在懷交穢汙歌此勸主人主人那不悟不
悟還更歌誰能恐違忤

採珠行

海波無底珠沈海採珠之人判死採萬人判死一得珠
斛量買婢天何在年年採珠珠避人今年採珠由海神
海神採珠珠盡死死盡明珠空海水珠為海物屬海神
神今自採何況人

同前

鮑溶

東方莫空海面平
驪龍弄珠燒月明
海人驚窺水底火
百寶錯落隨龍行
浮心一夜生
姦見月質龍軀看幾遍
擘波下去忘此身
迢迢謂海無靈神
海宮正當龍睡重
昨夜孤光今得弄
河伯空憂水府貧
天吳不敢相驚動
一團冰容掌上清
四面人入光中行
騰華乍搖白日影
銅鏡萬古羞為靈
海邊老翁怨狂子
抱珠哭向無底水
一富何須龍領前
千金幾葬魚腸裏
鱗蟲變化回陰陽

填海破山無景光
拊心彷彿失珠意
此土為爾離農桑
飲風衣日亦飽暖
老翁擲卻荆雞卵

平戎辭二首

王維

太白秋高助漢兵
長風夜卷虜塵清
男兒解卻腰間劍
喜見君王道化平

卷旆生風喜氣新
早持龍節靜邊塵
漢家天子圖麟閣
身是當今第一人

望春辭二首

令狐楚

高樓曉見一花開，便覺春光四面來。
晚日晴雲知次第，東風不用更相催。

雲霞五采浮天闕，梅柳千般夾御溝。
不上黃山南北望，豈知春色滿神州。

思君恩三首

令狐楚

小苑鶯歌歇，長門蝶舞多。
眼看春又去，翠輦不經過。
紫禁香如霧，青天月似霜。
雲韶何處奏，祇是在昭陽。
雞鳴天漢曙，鶯語禁林春。
誰入巫山夢，惟應洛水神。

漢苑行三首

張仲素

二月風光變柳條
九天清樂奏雲韶
蓬萊殿後花如錦
紫閣堦前雪未消

回雁高翻太液池
新花低發上林枝
年光到處皆堪賞
春色人間總不知

春風澹澹影悠悠
鶯囀高枝燕入樓
千步回廊聞鳳吹
珠簾處處上銀鈎

燒香曲

李商隱

細雲蟠蟠牙比魚孔雀翅尾蛟龍鬚章宮舊樣博山鑪
楚嬌捧笑開芙蓉八蠶蠶綿小分炷獸燄微紅隔雲母
白天月澤寒未冰金虎含秋向東吐玉珮呵光銅照昏
簾波日暮衝斜門西來欲上茂陵樹栢梁已失栽桃魂
露庭月井太紅氣輕衫薄細當君意蜀殿瓊人伴夜深
金鑾不問殘燈事何當巧吹君懷度襟灰為土填清露

房中曲

薔薇泣幽素翠帶花錢小嬌郎癡若雲抱日西簾曉枕

是龍宮石割得秋波色玉簫失柔膚但見蒙羅碧憶得
前年春未語悲含辛歸來已不見錦瑟長於人今日澗
底松明日山頭蘂愁到天池翻相看不相識

河內詩

樓上曲二首

鼉鼓沈沈虬水咽秦絲不上蠻弦絕嫦娥衣薄不禁寒
蟾蜍夜艷秋河月碧城冷落空蒙煙簾輕幕重金鉤欄
靈香不下兩皇子孤星直上相風竿八桂林邊九芝草

短襟小鬢相逢道入門暗數一千春願去閨年留月小
梳子交加香夢繁停辛佇苦留待君

湖中曲

閭門日下吳歌遠陂路綠菱香滿滿後溪暗起鯉魚風
船旗閃斷芙蓉幹輕身奉君畏身輕雙橈兩槳樽酒清
莫因風雨罷團扇此曲斷腸惟此聲低樓小徑城南道
猶自金鞍對芳草

同前

李 質

長眉越沙採蘭若桂葉水荇春一作秋漠漠橫船醉眠白

晝間渡口梅風歌扇薄燕釵玉股照青葉越王嬌郎一作

娘

小字書蜀紙封中報雲鬢晚漏壺中一作銅壺水淋盡

春懷引

芳蹊密影成花洞柳結濃煙一作陰香帶重蟾蜍碾玉挂

明弓捍撥裝金打仙鳳寶枕垂雲選春夢鈿合碧寒一作

空龍腦凍阿侯繫錦覓周郎憑仗東風好相送

靜女春曙曲

嫩蝶憐芳抱新蕊泣露枝枝滴天淚粉窻香咽積曉雲
錦堆花蜜藏春睡戀屏孔雀搖金尾鶯舌分明呼婢子
冰洞寒龍半匣水一隻商鸞逐煙起

白虎行

火烏日暗崩騰雲秦皇虎視蒼生羣燒書滅國無暇日
鑄劍佩玦惟將軍玉壇設醮思沖天一世二世當萬年
燒丹未得不死藥挈舟海上尋神仙鯨魚張鬣海波沸
耕人半作征人鬼雄豪氣猛如燄煙無人為決天河水

誰最苦兮誰最苦報人義士深相許
漸離擊筑荆卿歌
荆卿把酒燕丹語劍如霜兮腸如鐵
出燕城兮望秦月
天授秦封祚未終袞龍衣點荆卿血
朱旗卓地白蛇死
漢皇卻是真天子

月漉漉篇

月漉漉波咽玉莎青桂花繁芙蓉別江木
粉態裊羅寒
雁羽鋪煙濕誰能看石帆乘船鏡中入
秋白鮮紅死水
香蓮子齊挽菱隔歌袖綠刺罨銀泥

黃頭郎

漢書佞幸傳曰鄧通以櫂船為黃頭郎文帝嘗夢欲上天不能有一黃頭郎推上天覺而之漸臺以夢陰求推者即得鄧通夢中所見也顏師古曰櫂船能持櫂行船也土勝水其色黃故刺船之郎皆著黃帽因號曰黃頭郎黃帽蓋染綃帛為之也

黃頭郎撈攏去不歸南浦芙蓉影愁紅獨自垂水弄湘

娥珮竹啼山露月玉瑟調青門石雲濕黃葛沙上薜蘿
花秋風已先發好持掃羅薦香出鴛鴦一作熟

倚瑟行

鮑溶

漢書曰文帝至霸陵慎夫人從帝指視新
豐道曰此走邯鄲道也使慎夫人鼓瑟帝
自倚瑟而歌意悽愴悲懷李奇曰聲氣依
倚瑟也顏師古曰慎夫人邯鄲人倚瑟即
今之以歌合曲也

金輿傳訖言灞水涯龍旗參天行殿巍左文皇帝右慎姬
北面侍臣張釋之因高知處邯鄲道壽陵已見生秋草
萬世何人不此歸一言出口堪生老高歌倚瑟揚清悲
樂餘哀生知為誰臣驚謠歎不可放願賜一言釋名妄
明珠為日紅亭亭水銀為河玉為星泉宮一閉秦國喪
牧童弄火驪山上與世無情在速貧棄屍於野由斯葬
生死茫茫不可知是不一姓君莫悲始皇有訓二世誓
君獨何人至於斯灞陵一代無發毀儉風本自張廷尉

江南別

羅隱

去年今夜江南別
鴛鴦翅冷飛蓬熱
今年今夜江北邊
鯉魚腸斷音書絕
男兒心事無了時
出門上馬不自知

樂府詩集卷九十五